

Giusep Hounder : president della regenza grischuna e cusseglier dils cantuns, n. ils 9 de settember 1878, † ils 22 de schaner 1935

Autor(en): **Gadola, Guglielm**

Objekttyp: **Obituary**

Zeitschrift: **Il glogn : calender dil pievel : annalas per historia, litteratura e
cultura romontscha**

Band (Jahr): **10 (1936)**

PDF erstellt am: **22.07.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Gion Disch veva ina secunda olma e quella fuva artista. Quei fatg ei stau per part sia ventira e per part sventira. Igl artist en el scheva emblidar enqualga ils crests e las fogas de questa veta aschi maluliva, mo dava da l'autra vard ad el era il catsch de seglir levamein sur tut ils dutgs ora.

Nies car defunct fuva ensumma in um fetg intelligent ed igl ei mo de deplorar ch'el ei buca vegnius de sviluppar ed applicar sias forzas intellectualas el temps adattau ed el ver liug.

Ses studis gymnasials ha el absolvii a Mustér ed a Nossadunnaun. Silsunter frequenta el las universitads de Basilea e Berna, mo senza finir il studi della medischna. Havend stuiu ceder dall'idea de vegnir pictur-artist, havess Gion Disch era giu tuttas qualitads necessarias — e quei en ault grad — de vegnir schurnalist e politicher e sco tal havess il secretari gov. de pli tard (1919—1935) franc e segir prestau lavur en uorden. Sco schurnalist fuss Disch cun sia intelligenza naturala, cun sia buna plema, cun sia viva fantasia, ed armaus cun in humor plein spért e cor e cun da tuttas sorts experientschas staus in um fatg. Mo el ha malgrad tut aunc adina prestau bia buns survetschs alla pressa conservativa, romontscha e tudestga.

El ha surviu alla vischnaunca de Mustér, al cumin della Cadi ed il davos al cantun cun buca pintga distincziun.

Dasperas fuva Gion Disch, sco gia menzionau, in sincer e fervent promotur dil lungatg romontsch. De sias canzuns e poesias vegn beinenquala a restar — ed aschiditg sco ei dat affons romontschs vegn era siu „Pieder Spalau“, il meglier poem humoristic ch'el ha fatg, a delectar nos pops e poppas, sco era ils affons empau pli gronds.

Ord la veta de nies car Gion savessan nus raquintar aunc beinenqual cassa, mo essend che nus havein gia scret ina pintga biografia ed era undrau ses merets en quella (mira: Annalas IL. p. 178—192), sche lein nus schar de repetter cheu il medem.

Il davos onn de sia veta ha Gion Disch stuiu pitir bia dolurs e tribulaziuns, mo el ha acceptau quellas cruschs ord il maun de siu Scaffider cun curascha e resignaziun e preparau aschia a sesez in bien viadi sur cuolm. Siu davos suspir e desideri, ch'el ha aunc pudiu metter en rema, vegn il Segner segir ad haver exaudiu:

„Spendra mei dal mal, fai libers dals puccaus,
Sin la fin po dai a mi miu sogn e bien ruaus“.

Giusep Huonder

President della regenza grischuna e cusseglier dils cantuns

n. ils 9 de settember 1878, † ils 22 de schaner 1935

Cum moriar, medium solvar et inter opus. (Ovid)

Strusch 15 dis suenter la mort de siu premurau e fideivel secretari, Gion Disch, ha era il cau dil departement stradal e forestal liquidau tut anetgamein sias fatschentas terrestras ed ei marschus cun pei franc e segir viers la perpetnada.

G. Giusep Huonder ei naschius a Paris, ella capitala della nobla Frontscha, nua che ses geniturs eran setratgs per gudignar il paun de mintgadi, ch' era da lezzas uras aschi scarts ella patria sco oz puspei. Aunc pignets eis el vegnius anora cull'onda e staus cun lezza e siu aug a Rabius. Ella familia de Mihel Maissen eis el carschius si e vegnius tenius sco agen. Tgi havess era sminau da gliez temps, ch' il pign e falomber Gion Giusep vegnessi aunc a far in di ina tala carriera; gie, tgi havess era schau dar de quei el tgau, en quei temps che mo certas dynastias de familia vegnevan de semetter vid il tgamun de nossa democrazia?! Mo inaga ni l'autra schabegia ei era, ch'il ver um vegn alzaus el ver liug — e quei perfin en ina democrazia.

A Rabius ha il frestg mattet frequentau la scola primara e suenter eis el jus sin claustra e fatg la reala per continuar e finir quella 1899 cugl examen de maturitad el collegi de

s. Mihel a Zug. Suenter serenda el a Turitg sil politecnicum e finescha ses studis cul diplom de forester 1902. Sin quei examen final suonda la practica perscra, ch'el sa far a Turitg sut la capavla direcziun de col. Meister, administratur dils uauls dil marcau de Turitg. Suenter quei cnn practica, (entochen gl' october 1903), absolve el lu aunc igl examen federal e cun quel ha el ussa la pusseivladad de surpender scadina piazza de forester ella entira svizzera. El vegn elegius immediat sco cau-forester d'Appenzell-dadens (1904—1910) e sco tal regia el e negin auter, quei che pertegn l'administraziun forestala. Quei havein nus ord segira fontauna. Anno 1926, cura che G. Huonder ei vegnius elegius ella regenza, eran nus a Turitg. Cun nus studegiava in feagl d'in cuss. guvernativ d'Appenzell, che ha raquintau il sequent: „Cu'l Huonder ei vegnius tier nus ad Appenzell, vevan nus in uordenet cun nos uauls. Mo gia gl'emprem onn ha el viult entuorn bia, fetg bia; el era plein fiug, ideal ed energia per sia caussa e catschava tondanavon vinavon cun ses plans, sias ini-ziativas e sias lavurs, ch' el ha giu gl'emprem temps buca pintga opposiziun; mo el ha capiu de tener pètg entras la realisaziun de ses stupents projects e de sias oreifras ini-ziativas, aschia che nus havein alla finala schau ira nuidis el, fetg nuidis. — Sche vus haveis elegiu il Huonder ella regenza, sche mo cartei che lez regia e lavura sez e quei ch'el vul sto atras.“

Anno 1910 tuorna G. Huonder ella patria, essend el elegius sco forester cirquital a Trun, nua ch'el ha medemamein lavur uonda culla direcziun dellas fatschentas forestalas dils cumins della Cadi e de Rueun. Duront ils 16 onns suondonts semuossa ei clar e bein, che G. Huonder ei in um de siu fatg, in um pratic, luvrus e conscienzius e ch'el ei forester cun tgierp ed olma. Siu element fuva igl operar, luvrar e barhar! Ventireivels quel che ha quels regls; lez tegn stendiu e reussescha — e sche tut ils demunis digl uffiern e dil mund fussen encunter. Duront quei temps sco forester cirquital ha el baghegiu de quei de 80 vias d'auul, en tut ina lunghezia de 100 km. circa, pil daner ded 1 milliun. E tgi less dumbrar tut ils plans e projects, ch'el ha fatg e per la gronda part realisau!? Projects d'ustonzas de bovas, lavinas, regiuvinaziuns d' uauls ect. En tut pigl importo de 200 000 frs. Tgei bials onns de lavur! Dat ei in summa zatgei pli bi che haver l'ocasiun de luvrar, de vuler e saver luvrar e cheutras sviluppar sias forzas? El ha giu quella biala caschun el pli ault grad, mo ha era fatg diever ded ella el pli ault grad.

Mo ultra de quella buna qualitat de character, fuva cuss. guv. Huonder era in talent d'organisaziun; quella forza ch'ei segiramein buc in dun natural dils romontschs e grischuns, ha el demussau il meglier 1924, all'ocasiun dell'organisaziun della fiasta centenara della L. G. a Trun, sco era aunc tier bia autras occasiuns.

Igl onn 1926 la permavera ha la cumedia dellas elecziuns cantonalas entschiet. Els em-prens dus acts ein ils marcadonts e mulissiers della „politica“ seproduci; pèr viers la fin dil tierz act ei il num Giusep Huonder vegnius numnaus — epi sei stau finiu culla „cumedia“. Sia candidatura ei stada in clom ord miez il pievel, ch'enconuscheva meglier sias forzas e sias qualitats, ch'ils mulissiers della „politica de professiun“. Tier quella elecziun, han ins veramein saviu applicar ils plaids, ch' ein schiglioc els bia cass fetg dubius: „Vox populi, Vox Dei!“

Denton dev'ei aunc adina „politichers“, che schevan: „Il Huonder po esser in bien luvrer, mo politicher e diplomat! na, gliez s'el buc; leu vegn ei a muncar!“ Sco sch'il bein reussir dellas fatschentas e dell'administraziun d'in tipic departement de lavur, dependess dallas storschas e dals carrauns dils „politichers“ e dal vez dell'uolp! G. Huonder ei staus pre-destinaus per siu departement, fuva el gie da professiun forester e da talent e talien technicher; pia il ver um el ver plaz!

Vegnend a Cuera, accompignaus dalla confidonza de ses vischins ed enconuschents, ha el dalla bial'entschatta envi giu in cletg tut aparti e quei ei stau la gronda, gie, immensa lavur, che spitgava sil luvrer! Quella caschun ha el cargau pil cavez ed en cuort eis el staus patrun, el ver senn dil plaid, patrun en siu departement, sco darar, darar in! El


ei era staus quel, che ha fatg sez sias lavurs e sias obligaziuns e ch'ei staus neuenneu fetg spargnius pertent igl agid de commissiuns spezialas ed autras, ni sco quels surogats senunnan. Essend cau d'in departement ha el regiu e diregiu siu departement. Havev'el anflau ina caussa per buna, sche stueva quella atras, ni dir pertgei! Cheu dev'ei buca „nus lein aunc mirar“, „gie, ins savess aunc ver endamen inaga la caussa,“ „forsa ha il Gion ni il Giel in'otra idea“, ni semigliontas viarcas dil huz, che characteriseschan la dependenza e la superdiplomazia.

Havend fatg ton sco negina politica, numdir carriera politica avon che vegnir prius ord gl' uaul e mess a Cuera alla testa d'in departement, ha el giu la gronda cuida dal destin, d'era buc esser rentaus e ligiaus vid la „politica“ e ses „politichers.“ En quei grau auda G. Huonder denter ils paucs cuss. guvernativs, che nus havein giu! Sco administratur d'in departement dil cantun Grischun, udeva el agl entir cantun e buca mo ad ina partida ni clicca ed el ha era saviu esser quelluisa, perquei ch'el fuva il ver um el ver plaz, perquei ch'el dominava sia caussa me:sterilamein e suveranamein.

Tenor educaziun, tradiziun e principis udeva G. Huonder tiella partida conservativa. Mo malgrad ses fermis principis religios e culturals, ils quals ein e restan il compass per in um ch'ei um, ha el mai schau surpender dalla mania de politica de partida, pertgei ch'el saveva memia bein, ch'in cuss guv. hagi de dedicar tut sias forzas agl entir pievel grischun e buca mo ad ina partida de quel. Perquei capin nus era, ch'el veva buca ton per cor ils buccs de partida. Nus savein d'enzaconts cass de tala natira! Cura ch'el senteva che lezza „politica“ leva decider il giug, sche saveva Huonder schon era trer det e stuschar pugn. E cun tutta raschun: Sche Ti dattas a mi cul pugn de partida, sche survegnas Ti da mei cul pal della raschun!

Ed il pievel — mo bein capiu: il pievel de sauna raschun — de tut nossas contradas e classas socialas senteva quei e respectava el per in um integer e per in ver politicher dell'ovra.

„Las qualitats, che dominavan e characterisavan il defunct“, ha in oratur detg sur fossa, „fuvan sper sia profunda mentalitad christiana, verdad, gestadad, altruismus, scoera in'energia de lavur ed iniziativa extraordinaria“. Quellas qualitats che han gidau el essenzialmein en siu survetsch per la patria, ein era vegnidas prezias e stimadas dagl entir pievel. Vers merets vegnan, Dieus seigi ludaus, aunc oz preziai e valetai e quei buca mo el senn d'in necrolog, nua ch'ei vegn enconuschentamein detg „nisi nil bene“.



Giusep Huonder †

Mo nus vulein tedlar ina vusch competente, in um, ch'ei ni per bahautschas, ni per scenas romanticas. Siu collega Lardelli s'exprima sco suonda davart ils merets de sgr. cuss. gov. Huonder: „G. Huonder ha compleniu tut las speronzas ch'ins veva sin el e giustificau tut la confidonza ch'ins ha mess sin el.“

Quei ch'el hagi fatg per l'amegliaziun de nossas vias cantonalas, dapi l' uvertura ed il grond svilup dil trafic d'automobil, seigi in'ovra nunspazeivla e vegni a restar unida cun siu num. „Cun in'energia extraordinaria e cun ina ventireivla eglia egl avegnir, ha el priu a mauns la construcziun de nossas vias. En quels 8 onns eis el vegnius aschilunsch cun quella lavur, ch'ins sa dir, che pliras grondas reits de vias ein finidas ed autras curregidas, aschia ch'il grond trafic sin nossas vias sesvilupescha ch'igl ei in plascher...“

„Gia all'entschatta de siu uffeci ha el dau a nus in'emprova de siu talien de lavur e de sia gronda energia... numnadamein all'ocasiun dell'aua gronda 1927. Ad el havein nus d'engraziar, ch'igl ei vegniu remediau bia e spèrt e che las pli grevas plagas ein gleiti stadas medegadas.“

Ei seschass aunc menzionar bia en favur de ses gronds merets per nossa patria grischuna. El ha priu serius e conscienzius cun siu uffeci, el ha buca fatg catscha sil num, il sulet ch'el veva en egl fuva il pum; el ha luvrau, gie, sur luvrau e cheutras ruinau sia sanadad. Ch'ina tala forza de lavur e ch'in um de tal format fuva savens la mira de nauschas e malgestas attaccas, secapescha da sesez. Las bueras dattan per ordinari mo vid buns cavals.

1930 il mars, all'ocasiun dellas elecziuns pil cussegl dils cantuns, han ins all'entschatta puspei encuretge in politicher ed anflau per cletg e ventira in um dell'ovra.

Giusep Huonder ei vegnius elegius cun grond pli ed ha, durant quels 5 onns, luvrau a Berna exemplaricamein per nies cantun, sco era per ils interess della Confederaziun. Per quella nova scharscha fuva sia voluntad e sia disposiziun tut quei ch'ins saveva giavischar, mo quei niev e grev buordi tier tschel aunc fuva memia. Anno 1933, il matg, durant la sessiun dil Cussegl Grond, eis el daus ensemen sut igl immens buordi de lavurs e fastedis e suenter mai pli pudiu recuvrar sias forzas corporalas. Mo cedi ha el buc; el ha luvrau vinavon, secartend aunc adina de vegnir sauns, de vegnir sauns tras la lavur. Riend ha el manegiau inagada siper il scribent de questas lingias, visitond el, sgr. cuss. gov. Huonder en Val-Sumvitg: „Cun star cheu e far nuot vegn ei anzi mender che meglier, denton meglier fuss ei schon esser malsauns las vacanzas, che cura ch'ins duess esser giu Cuera vid la lavur!“

Emblidar astgein nus cheu era buca ses gronds merets pertenenent la cumpra e la restauraziun dil „Hof“ a Trun. Quell'ovra ideala e patriotica vegn a restar unida cunsiu num; atras ils tschentanners futurs.

Sco davosa pli gronda lavur, ha el priu a mauns l'uvertura dil Pass Gelgia per igl automobil durant igl unviern. Havend surventschiu tuttas difficultads e terminau tuttas respectivas lavurs, ha el, essend cuntents e satisfatgs de quell'ovra, vuliu mussar ella a ses collegas. Quei duev'esser la davosa de sias numerusas uatgas.

Ils 22 de schaner (1935), in bellezza di d'unviern, cun buca tac nibel en tschiel, eis el morts enamiez nossas bellezza muntognas grischunas. E sche nus patertgein scoiauda, sche mort ha el fatg ina biala, essend vegnius clamaus ord miez la lavur da Quel, che distribuescha la fin finala scadina lavur e che ha il cumplein dretg de dumandar plaid e fatg cur ch'igl ei e nua ch'igl ei. Ed il Scaffider, possessur della veta e della mort, ha fatg honor ad el cun clamar el ord miez la lavur, ch'era gie siu element, sia vertid e siu plascher. Nus essan ferm perschuaadi, ch'il pievel grischun vegn buc ad emblidar aschispèrt sgr. cuss. gov. Giusep Huonder, in dils pli luvrus e capavels umens, che nus havein giu ils davos decennis, e quei oravon tut per motiv, ch'elha, sco ver politicher, appartenu a tuts e luvrau per igl entir cantun e buca mo per la „politica“. El vegn per quella raschun, era morts a viver, ferton ch'auters vivan ed ein gia morts! R. I. P.

Gugliem Gadola